

1379

inclinare cœpit: Pisanus medio certamine ægre revulsus, victoriam hosti relinquens, trepido cursu & ipse domum contendit. Quindecim Venetæ triremes cum ipsis turmis in hostium potestatem venire. Paucissimi ubi rem perditam viderunt, consulto proximis littoribus illati in terram evasere. Ad duo millia hominum ea pugna capta dicuntur, in quibus multi patricii sanguinis fuere: cæteri partim cæsi partim vulnerati sunt. Pridie nonas Martias ea clades accepta est, qua omne fere maritimi belli robur est amissum. Tam funestæ pugnæ nuncius ingenti mœrore civitatem affecit. Pisanus & alii triremium, præfecti, quia pugnam detrectarant, jussu Patrum ærarii prius facti, in vincula sunt coniecti: illi, quia deferendo suos acceptæ cladis causa fuissent, Victor, quod ad pugnam inexplorato exivisset. Pisani damnationem iniquo animo populus tulit, sed iniquiore ipsam carceris ignominiam: rumor erat, invidia paucorum nobilium potius quam quod ita meritis esset, Victorem in vinculis esse. Genuenses una prospera pugna in spem majorum rerum erecti, ubi Jaderam venerunt, captivis præter paucos ignobiles in vincula coniectis, ad reparandas naves conversi, quæ non mediocriter pugna illa fuerant concussæ, Venetas inde Dalmatico remige instruentes, brevi tempore ad octo & quadraginta navium classem explevere. Prius vero, quam clades illa ad Polam accepta esset, sex aliæ longæ naves fuerant domoeductæ: ut & ipsæ in oræ Inferi maris res Ligusticas infestarent. Hæ quinque illas non multo ante profectas, quibus Carolus Zenus præerat, procul domo adeptæ, in reliquum anni usque ad medium brumæ (quo fane tempore, jam amissa Clodia, publico decreto revocatæ sunt) rem fœliciter Infero Superoque mari gessere. Ligur interim quum jam triremium multitudine abundaret, sexdecim Jadera eductis, Humagum, Gradum, ac Caprulas uno tempore occupat: inde onerariam unam secutus, Venetias usque tumultuose annavigavit. Et jam in conspectu urbis erat, quum Thomas Mocenigus, cujus oneraria illa erat, aquis & vento deficientibus, ad mille passus navi littoribus admota, ipse cum

*Pisanus ad
Polam clas-
sem amissæ,
atque ob id
in vincula
conjectus
est.*